

04 MAY 2004

PERSIDANGAN ANTARABANGSA PENDIDIKAN PENGURUSAN PADA JUN

ALOR STAR, 4 Mei (Bernama) -- Persidangan Antarabangsa Pendidikan Pengurusan yang akan diadakan di Kuala Lumpur pada 28 Jun ini merupakan salah satu acara kemuncak bersempena dengan sambutan 20 tahun Universiti Utara Malaysia (UUM).

Persidangan yang bertemakan "Management Education Excellence: The New Frontiers" yang diadakan di Kuala Lumpur itu dijangka dirasmikan oleh Perdana Menteri Datuk Seri Abdullah Ahmad Badawi.

Pengerusi Jawatankuasa Penganjur Persidangan itu Prof Datuk Dr Mohd Salleh Din berkata, persidangan yang diadakan ini adalah untuk menilai isu-isu semasa berkaitan dengan kecemerlangan akademik dan membincangkan tentang cabaran-cabaran utama, kekangan dan trend-trend yang berkaitan dengan pendidikan pengurusan dalam mengharungi era k-Ekonomi dan kesan-kesan globalisasi terutamanya kepada sektor pendidikan pengurusan.

Katanya dalam satu kenyataan hari ini, persidangan yang berlangsung selama dua hari itu dijangka turut dihadiri bekas Perdana Menteri Tun Dr Mahathir Mohamad yang akan menyampaikan ucap tama beliau.

Mohd Salleh berkata, dianggarkan seramai 500 peserta akan menghadiri persidangan dua hari itu yang terdiri daripada wakil-wakil kerajaan, swasta dan badan bukan kerajaan (NGO) dari dalam dan luar negara.

Bagi sesiapa yang berminat bolehlah menghubungi pihak sekretariat persidangan di talian 04-9285037/6666 (Puan Norma) atau melayari laman web <http://icem.uum.edu.my>.

-- BERNAMA

FA PR